

宋

史

翼

宋史翼卷十八

誥授樂祿大夫量贖前參巡廣東節通稱道親直憲道權福建運使衛鹽法道四級臣陸心源輯

列傳第十八

循吏一

胡令儀

西門成允

蔡黃裳

陳耿

王益

王絲

歐陽穎

張式

葉湜

王平

李夷庚

梁蒨

趙誠

寇平

范仲溫

沈衡

閻充國

石牧之

黃照

李彤

常琪

蔡天球

蕭固

崇大年

胡令儀閨封陳留人雍熙中明經第解褐涇州長原尉除潁川郡法掾辨析冤獄嘗活人於死拜大理評事知秦州海陵縣時江淮內屬未久吏姦民器視宰政如兒戲令儀先令後刑人皆凜然有西門豹之風遷光祿承眞宗嗣位改大理丞守巴漢郡進殿中丞領高密郡拜虞部員外郎典厯城郡會河決白馬爲朝廷憂詔發數十州兵民塞之科賦暴急後期者官吏有不測之咎諸道皆奔走民負敲扑令儀於部中

擇其挾貴人勢力州縣不敢動者一一家薄責于庭  
眾皆大懼曰是家不可緩況吾屬耶咸輦其薪晝夜  
以西比諸州率先以濟由是民不被楚吏不坐責徙  
隴城郡提點河北刑獄拜主客郎中充淮南轉運使  
改河東轉運使知鳳翔府每歲造舟六百艘供大河  
饋運必借民操篙沿渭而下以達于河凡有覆溺破  
產而償吏私諸豪專擾下戶令儀重爲立法使得均  
一民稱道之拜衛尉少卿分司西京凡十二年而終  
年八十七初天聖中范仲淹掌泰州西溪之鹽局秋  
潮之患浸淫于海陵興化二邑五穀不能生百姓餒

而逋者三千餘戶舊有大防廢而不治仲淹白制置發運使張綸綸表仲淹知興化縣以復厥防會雨雪大至潮洶洶驚人而兵夫散走旋濫而死者百餘人道路飛語謂死者數千而防不可復朝廷遣中使按視將有中罷之議遽命令儀爲淮南轉運使以究其可否令儀急馳而至歎曰昔余爲海陵宰知茲邑之田特爲膏腴春耕秋穫笑歌滿野今葭葦蒼茫無復遺民良可哀耶乃抗章請必行前議張綸亦請兼領海陵郡朝廷從之其董其役始成大防亘一百五十里潮不能害而二邑逋民悉復其業

范文正公集  
胡公墓誌

西門成允棣州厭次人景德中明法起家萊州司法  
參軍再選儀州華亭尉遷商州商洛令瀛州景城令  
除冀州南宮縣明道元年卒年七十三成允以法進  
而寬平毋害萊守苛深嘗有強盜欲寘之死使高贓  
估成允閱案請估依犯時持議甚堅會使者在郡守  
語先入交以責成允成允益不屈二囚遂不死華亭  
極塞蕃漢雜居多盜成允部督追胥教以捕法賞募  
惡少使與出入致其情雖劇盜必得之終去邑人無  
警商洛有兄弟訟財引其父爲左成允戚曰所貴乎  
人者爲其有恩也今何以自別于異類雖然豈天性

本然哉利蔽亡之耳姑歸推吾言思之于是相與泣于庭曰某曹小人今而後知利心不足以移親愛實自長官賜之拜而去一邑感動前日之父子異居若親在別產者于是皆合渭水經邑可溉田而民不知用成允親相地形率並水居人爲圩堰溝塍使之殖稻教以灌引蓄泄之法刻其法于石田歲增溉皆爲沃野民賴以無飢景城地卑而素無水防天聖初大霖雨成允曰前幸河安流今萬有一決吾民共爲魚乃白州預爲堤上下諠曰無故勞民非是成允曰請三思遂調夫二萬橫起大堤二甫半水已大至躬書

夜趣成之邑賴以免在兩宮既疾或勸以致事可得  
敘官于朝成允曰病不能事又意于利是欺也亟移

告以歸

劉忠肅集西  
門君墓誌

蔡黃裳字叔文福建晉江人大中祥符元年進士歷  
知鳳翔府虢縣鳳翔守有親校虢人也招權納賄黃  
裳至縣先執校縛傳舍中乃謁守條其奸狀置諸法  
一府大驚已而改知建陽秩滿縣人遮留許再任居  
建陽八年後爲鎮安軍節度推官以太子右贊善大  
夫致仕貧不能歸客陳州以席蔽戶誦詠不倦福建通志  
陳耿字仲操眞定人祥符初中第得上元尉遷建雄



軍節度推官知永濟縣王曾鎮魏善其政奏徙大名  
拜權永清節度判官薦者十餘章改祕書省著作佐  
郎知霍邱頃之移閩中遷太子左贊善除葉縣遷中  
丞慶歷八年卒年七十五爲人廉直不阿勢附俗長  
于爲政在永定軍人有殺死于路者賊不得其子疑  
怨家所爲詣吏辨訴吏以子言名捕訴者按之證逮  
詢詢囚無以自明耿察其不眞訟繫待訊而急白守  
丞請捕賊守丞怒曰司理侮法耶何敢爲死罪解脫  
遣他掾與雜治囚笞掠數百于不勝痛誣服具獄待  
報耿猶守之不聽人皆爲耿懼明年博野縣捕得眞

殺人者舉郡大驚眾乃皆服及爲永濟縣當契丹使  
往來道百姓騷擾歲歲苦之縣吏鄉典亦利得其勢  
侵漁細民耿至爲設方略飲食供張百物皆豫儲待  
後使者過縣不復有所謂取民便安之始至閏中歲  
大旱郡守希轉運使意不聽民訴災民遮耿自言耿  
卽詣府請之猶不許因趨出悉取民所訴狀屬吏以  
令蠲其租而公上轉運使轉運使初不悅後無如之  
何文彥博守成都聞而嘉之更分遣官屬行視兩川  
部縣之被災者皆奏除其望

公是築陳  
音慈記

王益字舜良臨川人大中府君嘗聞進士及第天聖八

年以殿中丞知韶州改太常博士尙書屯田員外郎  
越嶺川南素習於夷無男女之別日浸月滋爲吏者  
師耳目謂俗止如此凡姦事雖得有可已者皆不究  
益曰夫所謂固其俗豈謂是耶居郡求姦事最急苟  
有萌孽一切摘發窮治之屬縣翁源多虎益教捕之  
令欲媚益言虎自死與之至州爲頌以獻益便歸之  
曰政在德不在異州有屯兵五百人代者久不至欲  
謀爲變事覺一郡皆駭益不爲動取其首謀者五人  
卽日斷流之或請以付獄不答旣而聞其徒曰若五  
人皆繫獄當劫之然後眾乃服韶居南方雖小州然

獄訟最多號難治益治之有餘又因民之暇時爲之  
理營驛衣坊市道巷使皆可以久遠爲後利丁父憂  
去終都官員外郎益卽安石之父也

黃志

王絲字敦素會稽人大中祥符八年進士選大理寺  
丞奏獄必持寬典全活甚眾改太常博士通判衢州  
州未有學絲始建學舍百楹時金華郡守缺外臺假  
絲領之衢之父老遮於境謂婺民曰我州一鑑何奪  
之爲有詣外臺乞還者舉拜殿中侍御史慶厯中湖  
南蠻人亂攻劫郡縣朝廷以絲爲安撫至則察訪利  
病知前之主者立重賞以誅蠻人一級萬錢士卒貪

之往往害樵人以爲功遂下令曰得賊首者必指其  
鬪地以爲質其可擒者當生致之自是無枉戮者居  
軍中凡十月招安三千人遷侍御史充廣南東路轉  
運按察使時交趾有變而廣州當交趾之衝無城守  
儲絲議陶埴爲城造大艦十數日習水戰以待其來  
彼不復動歲餘以瘴疾求領小郡遷知通州通人歲  
苦海潮流亡者眾絲作長隄以捍之復民田業量其  
肥瘠奏免五年至十年之租召權三司鹽鐵判官卒

范仲淹王  
絳墓表

歐陽頴字孝叔吉州廬陵人登進士第歷官有能名

不誅嘗因轉對乘間言人不能無過若以古繩墨治  
之世殆無全人要之爲國家用者忠信而已忠信雖  
有過尙足用也

胡宿文集  
王君墓誌

李夷庚字坦之隴西人初爲從事以勤著績漕運康  
侯表於朝擢南安軍丞至道中升爲守雪冤獄二百  
餘人毀淫祠四十餘所天禧中守明州市有花樓神  
郡守初至皆謁奠夷庚獨不屑一日過其市飄瓦中  
蓋左右曰此花神之靈也夷庚曰今當毀之靈其何  
在遂毀之浚東錢廣德二湖大興水利民立祠祀之

嘉靖靖寧  
廣志

梁蒨字夢符襄陽人天聖五年以名進士起爲博州  
軍事推官再調鼎州團練推官江上夜覆舟提家人  
投舍民家明日主人出百金爲公裝卒不取至自裂  
衫裹赤兒懷去秩滿改著作佐郎知河南府長水縣  
取豪猾一人抵法邑大安治慶厯中改祕書丞通判  
大名府用安撫轉運使薦知深州遷太常博士召爲  
監察御史請外知磁州皇祐祀明堂恩拜尙書屯田  
員外郎復遷殿中侍御史時議開六塔以行大河蒨  
言騷民逆水非徒無益且有後患卒如蒨言奏罷張  
堯佐宣徽等使唐介以言事貶嶺南隨以中使蒨言

陛下愛介故遺護之不幸介以疾死天下後世能無以殺疑乎上曰誠不思此三爲還中使出爲京東轉運使前時類進羨贏蒙遷以故東方財屈蒞言民困敝不可凌願戒諸路毋得進羨財凡三司橫有取輒還其檄因蝗災請以米募人鑿取其種地中對以斗斛其孽旣易殄而方冬春艱食又可以補民其後遂著爲合州郡所饋一切不取轉侍御史還臺請裁任子令謂當自宰相始俄乞解言責改刑部員外郎直史館知襄州賜三品服徙邢州轉兵部嘉祐四年卒

年七十

劉忠肅集  
梁公墓誌



趙誠字希平

臨書作  
希中

福建晉江人天聖五年進士歷

撫州通判有疑獄守刻深趣上薄暮請判誠知翼日  
有赦故延讞實黎明赦果至獲免者眾改知歸州州  
有淫祠曰巴王歲夕殺人以祭誠毀祠投像於江州  
東三十里有新灘前後溺載不可計屢議疏鑿傍灘  
大姓射阻險之利輒以游言沮撓誠條奏利害結虛  
視役既成人號趙江就所廬祠焉入爲三司戶部判  
官出知明州卒於官

閩書

寇平字均輔膠水人景祐元年及第除試秘書省校  
書郎知深州靜安縣改開封府倉曹參軍遷著作佐

郎徙通判宿州以秘書丞通判徐州民苦輸鐵于官  
至破產猶責之不已平請以十之三均旁郡之戶至  
今便之權知淮康軍始至淮陽會獄有繫囚當死平  
疑其未得實更訊之果爲吏所誣囚且釋吏僅得減  
死眾皆相勸不敢以毫髮欺一日有告軍變者公旣  
密得其名乃陽以爲妄言使去明日大閱于鞠場因  
盡擒之是歲盜羣起而軍壁頽廢民不安其居平爲  
調農隙而完築之于是里人欲立生祠于岷山之陽  
平不許召充羣牧判官賜五品服歷判三司開折司  
遷尙書戶部員外郎奉使契丹還爲京東轉運使先

是流民以男女傭於富室者遇歲豐欲贖之不可得  
平勅其部中悉取以還其家又罪人之隸海島者過  
百人則不得其所平謂朝廷既貸其生而返罹非命  
非所以助上恩乃重爲立法其後更赦多得生還者  
從淮南轉運使再遷兵部員外郎真州長蘆寺瀕大  
江章獻太后時歲度僧者七人令置小舟上下以楸  
沈覆之患歲久事輒廢而度人猶如故平使籍其所  
活五人以上始得度人如舊式頃之淮陽戍兵殺巡  
檢以叛鄰州皆警平亟傳檄海上使舟楫遠去又募  
勇敢士授以方略令傳官軍以行旣而賊果領眾東

遁至海不見舟而還遂掩獲之賜書褒諭再遷兵部  
郎中加直昭文館徙知潞州加太常少卿又徙鄭州  
以終年六十二慶厯中嘗上政本書五十篇治平初  
又上陳宜書三十篇若寬天下力役定士子令汰冗  
官教宗室市邊馬復鄉兵多施用其言又自述平生  
感遇事作考祥集采其所見聞有足以自警者作警

異志

華陽集寇  
君墓誌

范仲温字伯玉幽州人唐末家於蘇臺景祐二年以  
恩例補試將作監主簿除越州新昌尉以誠接物民  
用知勸在邑三年盜不及境外計舉監杭州餘杭縣

市征能寬其利商旅便之三載以績聞除寧海軍節度推官知台州黃巖縣慶曆七年海潮大至壞州城沒溺者甚眾仲溫教民爲浮晝夜救之全活數千人上官請董眾以治城仲溫雅喜利人長於慮事眾議築土爲城用甃以傅之仲溫謂人築且勞又捍水之衝甃何能久乃集民累土以牛數百蹂之堅而後表以長石互相銜枕勢莫得動其城入門皆設之閘眾服其善歲飢州命邑官率富人出穀俾輕其價以助窮民而窮民乏貲無以得穀仲溫諭貸之眾皆悅從飢者獲濟黃巖大邑民數萬戶訟爭盈庭仲溫專尙

仁愛多以理遺民自愛服秩滿遷太子中舍致仕范仲

淹范伯  
王墓誌

沈衡字公持越州蕭山人景祐進士知台州臨海明  
州鄞杭州錢塘三縣通判濰淄婺三州自校書郎十  
遷至尙書職方郎中出登聞檢院出知潤州以疾得  
請提舉杭州洞霄宮熙寧七年卒年六十八衡嚴整  
守法尤精吏事始爲臨海時年尙少縣境瀕海多聚  
盜羣不逞之徒時或殺傷良民奪其資貨衡悉爲究  
訪且知主名區處募少壯千餘人一旦與渡海以計  
擒之窮治得其實抵法者二百餘輩人自以不冤郡上

其事時相才之進官雖一等泉有二商人負擔出而  
一人獨過期不返其家意爲先歸者所殺得敝裘與  
荷擔之人適相類者卽訴于縣其人不能自直遂誣  
服云棄其屍于溪側官使人視之則腐敗不可識矣  
雖縣吏亦以爲真殺人者乃送之州衡省案摘其情  
曰豈夜半殺人而能負重走百里且至城下乎且其  
人存亡未可知因揭于道以訪後行者數日果有人  
言常見之于它郡卽召而歸之因遂得釋一郡皆歎  
伏灘州有里人欲汙其兄者其兄以告它日遇諸途  
而毆之至于斃州將當其抵死衡固爭不得遂請于

朝果杖而釋之

蘇魏公集職方郎中沈君墓表

閻充國字厚民洛陽人慶厯二年進士第調鄭州滎陽尉用薦移唐州河陽令遷著作佐郎知澶州衛南縣巡檢張繼明暴虐所部卒持兵謹諫將殺繼明以爲亂充國聞之命駕欲往從者曰彼亂以成矣願無往充國曰卒亂將害吾民卽馳慰諭卒悔皆泣拜乃執首惡械于州餘請釋而不問知鳳翔府岐山縣改霸州大城縣東南當大河支水歲決注民田淤漫爲陂充國率民築張光隄隄將成水大至役者驚潰充國獨留隄上曰民第去令獨死於水役者回顧相率



復竭力爭赴而隄遂成向之隄地復爲良田自是大河屢決不及雉霸隄之力也故民目爲闔公隄被選知永靜軍將陵縣大城民號泣遮留不得去充國微服夜遁安撫使以其事聞詔卽還舊治大城民扶攜老幼迎上而將陵民遮留如去大城時二邑之民至持白挺爭持相攀挽吏以朝命諭之累日方散去朝廷聞之特召爲三司鹽鐵判官神宗登極遷都官員外郎求便親出知德州時地震後瀕河州縣大興隄徭河流至德州勢尤高悍視城中如深壑居人惴惴充國卽出常平粟募役者又請給僧道度牒募人輸

薪而薪不時至充國乞易納見緡以市不待報而行  
人以爲便大築遂成又築小隄以衛濱水之田自德  
至滄州護田數萬頃改職方員外郎知耀州遷屯田  
郎中知江州轉都官郎中知博州元豐八年無疾卒  
年六十有七

范忠宣  
公集

石牧之字聖咨越州新昌人慶曆二年進士試祕書  
省校書郎補杭州新城尉移台州天台令自初任已  
有能名于時王安石知鄞縣陳襄令仙居號江東三  
賢用薦格改著作佐郎九遷至朝議凡知江寧鹽城  
雍邱三縣通判溫湖舒建四州後朝選知溫州增廣

天台縣學擇鄉先生居師授之任以延俊造先是邑  
有母告子不稟教令者訊之無大故乃呼之前喻以  
子事父母之道丁寧訓敕使亟歸奉養後二十年行  
李過其境上母子泣拜馬前曰無狀子自蒙教戒感  
懼惕厲遂爲善良聞者以爲近古循吏之政熙寧初  
頒常平發斂暨役人免募法州縣急于期會因致煩  
擾詔遣侯叔獻察訪至雍邱詢之父老咸曰編戶但  
知變法而不知變法之擾叔獻以聞始泄永嘉病火  
政素怠颶風至則焮焰綿亘姦人利救焚黷賊吏恬  
不怪寢以成弊因舉行火保之令預爲約束使知有

犯連坐一日火作親率部伍視畚揭鞭击之不悉力者收之餘悉競前俄頃而撲滅自是其弊遂革郭有通衢名五馬闔塞不通人行久矣問吏屬則曰俗傳闢之利舉于不利長人乃詆曰有是乎立命撤屋開路自爾衝衢不絕後累有登科者人德之早厲士節出處進退不靳苟得晚年通性命之理視死生窮達爲一元祐八年卒年七十有九有遺書一編疏五十餘事處理家政至于廢斂之具喪葬之節賓客之禮子孫之戒纖悉無遺者門人葉經敘其始末爲往生錄趙清獻公歸老過溫其子岷方爲倅貳公每戒之

曰善事石君其著于筆札則有易論解經訓傳雜文  
歌詩總七十卷

蘇魏公集朝議大夫石君墓碣銘

黃照字晦甫世爲益陽人其後徙江陵慶曆六年進  
士除歸州司理參軍移華容令至之日遭歲大飢亟  
諭富人出米繼發官廩以哺流餓活人以萬計邑西  
有腴田數千頃而夏燥秋潦民棄不耕照築堤置門  
以時啟閉遂常爲豐歲楚俗死者焚而委其骨於野  
照諭使收瘞至輟俸以濟之小吏敏秀可教者授以  
經業多至成士民之輸賦於府者有洞庭之阻照請  
受之於縣其後遂以著令改著作佐郎知江華縣益

用愷悌以祕書丞通判桂州遷太常博士嘉祐六年  
詔遣使分行天下以寬民力而照當使廣南受命卽  
行奏蠲僞劉以來丁米民始不以多男爲患父子始  
不以避重就輕相去廣州增外城人驚不盡照疏曰  
無故起大役非所以綏邊且城議有二其欲依海者  
海旁之地不能尺則及泉矣欲撤室廬者城本以保  
眾而顧可先毀其居欲卽於劉氏故城者其地荒陋  
多瘴氣豈便民之意皆非是詔罷其役朝廷第使者  
之狀照爲諸路最英宗立拜尙書員外郎改福建運  
判治平三年用王珪馮京范鎮彭思永前後薦召以

爲侍御史行次衢州以疾卒年五十四照性端敏好文嗜詩治身立事皎皎在道疾革猶自力占疏極論濮園事任二十年不爲私計調族之孤寡不能嫁娶

者十餘人

劉摯撰墓誌

李彤字周伯四川晉原人慶歷六年進士調眉州青神尉歲滿遷江陵府松滋令授隴州判官知太原府平晉縣改祕書丞尋遷太常博士知華州鄭縣以疾分司西京熙寧五年卒年五十四彤自處素高剛而不撓萬州有篁人之脈者提點刑獄視之疑且怒欲以骨折論太守畏不敢辯彤提傷者以告曰折則上

下不相屬今舉其上而下不稍曲非折明矣使者無以勝卒輕之又有一人謀殺一人者彤方攝督郵當議法卽白守曰一人死安可戮三人坐謀首可也守不聽有詬責言彤持之益堅請於提點刑獄且曰某寧解綬云安忍妄殺人求順太守意耶得聞之朝止報一人萬州帑失緡錢數千萬俾驗之以爲貫朽鐵壞不知幾十載一旦指爲盜疑或刻深請飭吏共償無煩構獄守從之免數輩刑竄松滋產茗歲輸府千斤春未社牧遣校至督所有彤曰今未知茗之芽否可偕往視卽斫根株俾校持以歸願牧植之後園俟



其芽可責輸矣牧始不擇旣而從之皇祐甲午卒年

七十

呂陶淨德集  
李太博墓誌

常琪字君璧四川江源人慶歷六年進士孫夢得張  
安道實司文柄以癩日祀祔爲題琪之辭章詳實華  
潤攷爲第一旣擢第調合州軍事推官徙華州節度  
掌書記用薦者授秘書省著作佐郎知江陵府公安  
縣遷秘書丞知三泉縣歷尚書屯田都官職方員外  
郎通判忻州又漢遂二州爲屯田都官郎中移知資  
州果州又知邛州敏於吏治濟以彊力事不擇巨細  
必究極底裏然後行之人多以爲宜懷安軍三江堰

以侵斃致訟歷四十年不能已琪時在漢州兩蜀使  
者委之按治琪鉤索本末得其情歸所侵田而復其  
堰漑潤之利凡四千頃果州瀕嘉陵江歲歲水患琪  
審視形勢爲長堤捍其衝民得不魚至今賴之性穎  
悟初就學誦書雖數百言一閱遂記稍長泛觀羣籍  
好周官戴氏禮凡先儒之注釋異同徵顯錯出互見  
悉能通之尤精於名數制度以至圭幣冠服車符樂  
舞牢鼎盥尊之類用於禮者其規範之巨狹容色之  
丹黝先後之序繁簡之差皆能條別指數聽其言如  
視諸圖作爲聲律曲折中度元豐七年七月卒年六

十一 淨德集常  
君墓誌

蔡天球字粹夫宋城人慶歷六年進士及第爲宿州  
觀察推官會歲荒民飢詔所在選官賑哺君所活數  
十萬人改澶州節度推官數以義理劇正其上官無  
小大不直不已有能名改祕書省著作佐郎監杭州  
樓店務英宗卽位遷省丞知蒙州不鄙其民爲立學  
校開以教化人人嚮勸轉太常博士神宗卽位拜尙  
書屯田員外郎通判乾州熙寧二年卒年四十五天  
球學于徂徠石介年雖少已卓卓有聞于吏治敏以  
達在蒙州躬攷覈版籍得隱稅積錢至百萬監司言

狀請賞曰是固不足言功誠因此得推法天下庶乎  
爲有補爾代還又上書言二廣荒遐州縣有不足置  
者勞敝民而公私亡所利議者方愛虛名甘實患非  
是未幾詔諸路併廢州縣以寬役省費而三司亦置  
帳司列賞罰以專鉤會著易論十卷孝經一卷雜文

詩百餘卷

劉忠肅集

蕭固字幹臣新喻人第進士累官屯田員外郎慶歷  
間區希範誅廣西困於兵詔以固知桂州兼廣西都  
巡檢提舉兵甲溪峒事至則因其故俗治以寬大廣  
西遂安以才選爲荆湖南路提點刑獄未幾以固之

信於南方也又以爲廣西水陸計度轉運使方是時  
儂智高蒐兵誘聚中國亡命陰以其眾窺邊境而邊  
吏士尙皆不寤固獨憂此謂必爲西方之患乃選遣  
才辨吏說智高內屬上書言狀請因以一官撫之使  
抗交趾且可以紓患書下樞密以智高故屬交趾納  
之生事詔問固能保交趾不爭智高終無爲寇則具  
以聞固疏言蠻夷視利則動必保其往非臣之所能  
顧今中國勢未可以有事於蠻夷則如智高者撫之  
而已且智高才武強力非交趾所能爭而蓄也就其  
能爭則蠻夷方自相攻吾乃所以閒而無事爭議至

五六不報又奏請擇將吏繕兵械修城郭以待變亦至五六又皆不報尋召固歸智高果反廣西所至殘破一時士大夫因知固智謀可以任邊事頃之復以爲廣東轉運使又以直昭文館知桂州當是時儂宗旦聚兵智高故地無所屬邕州爲之警諸將皆議與師固又獨持招降之議朝廷用其議宗旦遂釋兵服以爲西頭供奉官而邊無事以集賢修撰再任會蠻申紹泰反巡檢宋士堯戰死固坐免遂告老著有奏議二百餘篇其言詳密多世務之要

臨川集蕭君墓誌

崇大年字靜之慶厯中擢進士第知青田縣民貧無

以納和買大年悉令候冬熟州符督責追杖縣吏大年曰年凶民飢若催督必破產雖杖胥吏三五輩尙可寬一邑之民至冬民輸無不足者徙知浦城縣舊設兩棧民以事追去無輕重悉置棧中大年曰此牛馬吾民悉命撤去以疾丐分司歸吳日與程師孟輩觴咏燕游號吳門十老大年德守淳固志向夷曠恬於勢利浩然易退吳士自陳之奇後大年繼有賢稱卒年八十二宋長文與鄉人議諡謂黔婁諡康陶淵明諡靖節大年當有道之世秉難進之節仕而知止貧而忘憂凜然有古高士之風乃諡曰康靖先生

志

宋史翼卷十八終

男樹

韓聲

校字



宋史翼卷十九

韓榮祿奏請嚴前分巡廣東副使張道權等違使司鹽法道加四級臣陸心源輯

列傳第十九

循吏二

侍其璋

黃

莘

從子陸

陳

邾

皇甫鑑

韓正彥

司馬京

費琦

陸琮

孫載

王默

家定國

李撰

陳廓

黃彥

鄭景平

段縫

蔡奕

郭子臯

吳革

李傑

潘鯁

吳思

吳與

楊存

郭大昕

蔣圓

侍其璋字良器世仕南唐李氏祖顯始自建鄴徙蘇州之長洲家世以武顯璋獨習儒學皇祐二年進士調杭州主簿改仕富陽有兩稅局一隸主簿璋課輒倍他日專征者負殿且罷斥璋悉推羨數畀之以此稱長者改開封陽武軍主簿政殊異尹包拯村之命攝右軍巡判官有亡命卒坐剽金論棄市獄具璋視文案疑有寃得其情白尹平之囚以不死梁官著任

佐郎知光州在固始縣穿永清南津二渠漕粟溉田  
交賴之遷知化州地僻陋瑋始築校舍親爲擁經講  
校義訓化行南土歸裝無嶺外一物移知池州遂乞  
致仕性靖退知足孤立介特以質謹自將不肯嫵媚  
權近仕進淹晚不一綴懷嗜學喜聚書工草隸善屬  
文賦詩尤多製續千字文行於世吳中資產盡推與  
同族晚無所歸徙貫宣城崇寧三年卒年八十三子  
鉉字希聲知潯州徽州皆有政聲

葛勝仲丹陽集  
侍其公墓誌

黃莘字任道福建浦城人曾祖元吉仕江南李氏祖  
覺字民先景德二年登第有詩名與楊億劉筠章得

象宋祁等相倡和累官至殿中丞以清直聞父孝綽  
抱德不仕僑居舒州之太湖人稱潛山先生莘擢皇  
祐五年進士第調揚州天長主簿徙恩州清河令黃  
河舊在州境縣歲輸芻茭後河徙猶賦之積逋四十  
萬皆貧戶都水使者督不已莘條列於朝悉蠲之時  
有旨遣使寬恤民力欲一切罷河北驛傳之須於民  
者莘上言騷民故當禁而事繫國信往來亦何得廢  
獨可具民所勞費以其數當稅役詔從之公私皆便  
歲饑部使者不肯賑莘遂發寧化鎮倉所活甚眾秩  
滿改祕書省著作佐郎知曹州濟陰縣神宗卽位就

遷祕書丞廣濟河決勢蹙甚莘徇邑人議破南隄以  
分水水去病鄰邑莘曰此於法甚重奚可以累他人  
亟自劾宰相韓琦以下皆有論按知寃句縣事張復  
禮請納官以贖之詔薄其罪奪一官罷歸琦留守北  
都薦授國子監承久之遷陝西提點刑獄駕部員外  
郎及逢坐市易事繫秦州詔獄逮累三百人主者幸  
有功慘覈巧詆給言逢病故緩之莘攝州事亟遣醫  
診視得逢無恙狀乃檄問不實之由主者情見趣竟  
獄不敢小出入逢得無寃召入尙書省爲職方員外  
郎賜緋衣銀魚丐外知汝州哲宗卽位遷朝奉郎以

足疾請致仕尋卒年六十有五莘性諒直勇於爲義  
布衣時聞舒州望江令豐有孚能吏以誣繫獄卽馳  
見轉運使王素曰其冤素立釋之莘故不識有孚有  
孚亦不知有莘上疏論免役錢不當反下戶人以爲  
知言始寓衛州晚徙鄆州須城遂家焉

從子陞字道偉莘弟藝之子也登崇寧二年進士授  
濟州鄆城主簿歷知廬州合淝縣合淝當兵興之際  
一切供給賦取於民陞隨事力爭有不得已視其等  
哀而均之吏不得並緣爲姦擢知邵州改永州值湖  
南大旱米斗千錢陞旣發官廩賑之復勸富民出粟

猶不足給乃請於宣撫使李綱願出諸司封樁粟以  
續之沾被一路所活數十萬人丐主冲佑崇道兩祠  
起知筠州積官至朝散大夫

劉忠肅集黃君墓誌銘

陳郭字彥聖建陽人嘉祐二年進士歷歙州軍事推  
官熙寧五年賞修水利勞進光祿寺丞尋知崑山縣  
歲饑屬邑希部使者意不敢蠲賦郭曰歲歉而賦不  
蠲饑殍滿壑何以奉公竟蠲之後爲司農丞未嘗謁  
政府遷太府丞請外除閩漕尋改江淮荆浙福建廣  
南提點坑冶元符元年罷三年坐爲訴理所勾管文  
字時雪熙寧以來斷過刑獄謗訕先朝歸怨君父勒

再坐元符末年其成黨與變亂法度降朝奉大夫  
官勾河香宮崇寧三年入黨籍大觀二年出籍性情  
鯁歷官五十年退無居廬舊吏餽金數百而不受

建福

通志進士表  
參通鑑長編

皇甫鑑字唐弼曹州乘氏人由父廕官台州司法參  
軍調單州單父縣主簿三司舉知光州光山縣兼買  
茶場事百姓販私茶犯法鑑曰貧民以茶養生亦何  
異於爲農不忍繩以重法郡守以問鑑對曰貧民不  
得販茶且爲他盜罪辟益重不如容之使有以自存  
縣吏張盛猾惡爲上下患鑑收治真法餘吏戰栗終



任無敢犯令者官滿轉大理寺丞知并州錄事參軍  
曲陽縣民兄弟訟者兄告其弟非同父不分與田產  
弟不能自明縣邑久不決府使鑑治之鑑使人按視  
其父母葬告曰彼雖無石銘棺槨外當有題志者于  
是驗之果悉書其子孫名字而其弟在焉訟者于是  
首服東河用錢銅鐵二品均等鐵錢輕又盜鑄者多  
詔變其法以鐵錢三當銅錢一百姓奪貨失業市井  
譁噪經略使鄭公集眾官謀之鑑曰小民失職無聊  
宜使人往慰之耳鄭公使兵馬都監謝雲行出諭之  
民因求見太尉既入鄭公捕其倡率者將刑戮之百

姓皆哭鑑曰民以無聊故願見公公重困苦之眾怨  
且怒將不可解鄭公乃止鑑又曰兼并之家典質錢  
舊出十乃今償三十何厚幸也而貧民失業又兩倍  
輸此其所以患新法之變耳今使以舊數償雖不利  
兼并之家可以悅眾從之而軍中猶疑縣官出錢方  
請用舊法相與藉議謀變鄭公憂之鑑曰兵今當給  
料錢比文書具更歷勾院逾二三日久可不俟文書  
具給之後徐入勾無害也于是人情始安改太子中  
舍遷殿中丞改尚書虞部員外郎又遷虞部郎中致

仕年七十五

劉效彭  
賦集

韓正彥字思德魏公琦猶子嘉祐中知崑山縣號爲  
難理正彥能以靜勝罔圖爲空創石隄疏斗門作塘  
長七十里人不病涉得膏腴田數百頃部使者以最  
上又請以輸州之賦十三萬從便輸縣鳩作塘餘材  
爲倉廩以貯之民大悅比去遮道以留立生祠作思

韓記鑑石祠下

中吳  
紀聞

司馬京字亢宗以從祖蔭補太廟齋郎監青州酒稅  
以景德道判綿州潞州歷太子中舍殿中丞虞比駕  
三部員外郎知趙州未赴改博州遷虞部郎中始爲  
三州刺史丞相守秦州政尙威嚴官屬震慄京嘗白事

不可丞相厲免同之京端立於庭爭之愈彊必從乃  
已丞相無如之何在潞州太守役兵治園亭旬休不  
得京直縱遣之太守又行伍係法一人有罪輒連坐  
數家日槌數十人京一切釋去不問太守雖甚怒然  
以京廉潔周慎卒無以中傷其知博州能河朔盜賊  
大起百十爲羣所剽掠盡入賊讎驅殺官吏京督  
責討捕歲餘悉平時強盜羣到即承者法皆免死盜  
倚法爲姦益滋京擢其尤無良者諭伍伯悉榜殺之  
文潞公安撫河北以博州多盜始欲奏勸已而深知  
其能乃表薦之元豐二年卒年六十八

費琦字孝琰成都人鄉進士在第一遂中科仕興元  
府戶曹參軍遷合州赤水縣令用薦改祕書省著作  
佐郎知定州安喜縣民有婦自經父母謂夫家殺琦  
驗謂無他覆視者既異訟辯不已州將置疑有司皆  
傳會連逮數十輩淹繫累月竟不能奪琦議黍苗將  
熟匹夫蔭其下遷者執爲寇誣以巨罪琦索其情輒  
釋之郡欲深治琦不忍致之法未幾旁邑果獲真盜  
眾服其明於是部使劉庠呂大防張問皆薦琦才請  
以治無極朝廷從之縣接契丹境一日民訛言相驚  
謂北兵來浸皆閉戶自匿市井不相通琦不爲之動

有以慰諭其心凡三日復業如故兵亦不至保州民  
集眾數百擿登聞鼓訴屯田水利事事久不決郡邑  
患之安撫使委琦按視卽條利害以圖上其說行公  
私以爲宜熙寧中差通判蜀州緜州元豐三年正月

卒年五十四

淨德集費君墓誌

陸琮字寶之會稽人以從叔軫任郊社齋郎爲吉州  
龍泉縣主簿壽州壽春縣令虔州石城虔化兩縣又  
知江寧府上元縣知連州通判潤州又知處州其爲  
虔化令趙抃辟也邑號難治風俗壞久矣至于子輾  
父足弟捩兄臂爲之者莫怪有翁在庭訴其子毆者

使腰以石沈諸江若是者殺三人于是一邑大驚俗  
驟變或以比鄴令殺河伯娶婦在潤州歲大饑斗米  
錢三百疫繼作方攝州事圖所以奏卹之方備至適  
有官舟溺米數萬石有司請曝之入州廩琮盡使貸  
民人用以濟去壽春時嘗有以錢千緡粟千石半途  
贖者琮不顧爲人尙氣節對賓客不改越音言雖無  
率然意所造自有餘趣老猶賦詩公餘觀史以俸餘  
買書曰吾以此終身亦以此遺子孫可矣元豐五年

卒年六十有六

陶山集陸  
公墓誌

孫誠字積中崑山人登治平二年進士第爲河中府

戶曹更三守皆立威嚴載獨與爭曲直不肯少下終  
以此見知中書險正官察訪關中辟爲官屬青苗法  
行乾祐令不以予民察訪怒檄載按之載還言邑小  
民貧其徒歲以黍麥博易爲生未知稱貸公家爲利  
令無罪用薦知德清縣以德化民聽斷精明不專任  
刑罰開誘是非出於誠信訟有累年不決者得一言  
皆感悟舍去熙寧八年吳越饑獨縣中熟載勸大家  
倍糴得十五萬斛明年春米價翔踊載使平直以糴  
全活甚眾移考城縣地多盜載明賞格嚴保伍一日  
巡尉來告盜集境上將以上元掠近郭至期載張燈



設宴不禁夜如故事盜叵測遂遁去訖受代無復盜者神宗以載姓名付中書除廣東常平觸暑行部以宣德意元祐初遷廣東轉運判官紹聖初知海沂二州再知婺亳二州延聘名儒興學養士爲治務持大體時號循吏以嘗薦元祐黨人授提舉洞霄宮大觀中以朝議大夫致仕一日徧謁先壟及嘗往來者未幾疾革問日早晏盥水焚香而逝年七十五載天資樂易長於吏治薦士至四百餘人後多知名喜讀易

著易釋解五卷

中吳紀聞  
盧志合纂

王默焚道人字復之幼小執養事師趨庭問膳自有

度量登治平四年進士第授什邡縣主簿調夫築洛  
口堰共十萬鄰邑憂不辦默酌民言而賦功省不閱  
月而成遷通泉令通泉歲饑甚不待報而發廩久不  
雨至是而雨有千頃渠堙廢不知其始其旁短戶積  
歲不能入賦囚民願決其源二十里注之江歲以大  
熟民畫像祀之熙寧中熊本察訪陝夔路薦默任提  
舉常平尋除轉運使苗時中饋軍興奏默管勾文字  
討乞弟師還以瘡痍不能隨師者萬人且棄死夷地  
請以運糧虛舟載之分責使臣將護醫粥以卒之存  
亡爲殿最所全活者十七八以軍功吏考遂改承議

郎泛恩遷朝奉郎請老而歸十年乃終

山谷文集

家定國字退翁四川眉山人六歲知聲律客以對句試之曰笙歌陪酒聖卽應之曰桃李從花王客大驚聞者以爲奇童方冠舉進士除雅州名山尉調永康軍司法韓康公帥蜀欲治西山道至威茂建玉壘關定國謂蜀近夷惟恃險以安昔唐中衰吐蕃三入寇一出汶川今鑿石平塹爲坦塗將貽蜀之憂康公信其言捐工役之半再調澧州司理提點刑獄賈宜言囚部吏饒瑄欲誣以巨罪定國不從賈怒屢摺以事卒莫能得識者嘉其持守遷秘書省著作佐郎知嘉

州洪雅縣簽書蜀州判官事二川田稅舊有折變絲綿者估才十之一監司猶欲加以耗定國謂既變而斂則與正稅異豈復有耗耶乃以辨析得免又嘗增損印蜀水平之制均二渠水利鬪訟止息人至今以爲宜歲滿通判瀘州知懷安軍有惠愛紹聖元年卒年六十四尤工於詩古律凡三十卷雜文十卷體格

清懿如其爲人

淨德集家君墓誌

李撰字子約福建連江人熙寧六年進士

案續通鑑長編以撰

爲蘇州人而宋史撰子彌遠傳亦云蘇州吳縣人攷撰墓誌言撰父處常娶范氏司封員外郎元之女國博之喪諸孤無所歸范爲營室於蘇故今爲蘇人然彌遠作連江縣移學記云自三世祖出居越百年而

歸是撰家特僑寓於蘇其後仍歸連江史未之詳考耳 調越州餘姚主簿有茶

商夜行遇海舶鉦鼓偕鳴疑爲盜持短兵格鬪殺傷十餘人繫蕭山獄久不能決趙抃守越州檄撰攝縣事撰至視案牘卽得其情曰犯時不知在律勿論具聞於州杖遣之抃器其能薦監揚州高郵酒稅移江州彭澤令彭澤俗喜訟而尙鬼撰一導以信義訟日益希巫覡有前期唱某日所災者已而果然民懼禍轉相趨奉撰召羣巫於庭問以火起期日處所令將詣伺有不信抵罪羣巫恐皆曰無有乃下令敢假鬼神造言惑眾者坐之人心悉安朝廷下括田令轉運

使欲多得匿戶羨田爲功撰持不可轉運使怒翼且  
且行撰抱牘夜徑造臥內轉運使驚問撰曰彭澤令  
以公事白願起視之抗論移時且請就劾解印綬去  
轉運使度不可屈卒從之然猶未解是時王安禮以  
端明殿學士知江寧府轉運使還以其狀告覲其搆  
撰罪安禮曰縣令乃敢與部使者爭衡此必介特有  
守士也亟呼吏對轉運使前草奏薦撰轉運使意沮  
而去曾布知青州辟置幕府撰少受業於布之兄翬  
及從布辟翬遺布書以幕府得忠信之士爲可喜礙  
吏部例格不行布移瀛州再辟爲州學教授元祐三

年朝議遣使修復河流故道撰作修河賦二篇上之  
大概言河不可復究當時利害甚悉不報後卒如撰  
言未幾除太僕寺主簿紹聖四年欽聖太后出幸撰  
行馬御路東誤不引避爲殿中侍御史蔡蹈所劾貶  
監饒州德興縣酒稅徽宗卽位轉承議郎通判莫州  
改簽書泰寧軍節度判官值歲水災撰首議賑救民  
不知饑秩滿就差通判袁州撰浮沈州縣三十年不  
以淹滯介意或勸撰詣朝廷申理撰曰吾每以士人  
老不知退爲鑒今躬蹈之耶竟不往大觀三年除通  
判保州未行而卒年六十有七子彌大彌遜彌正自

有傳

揚廬山集李  
子約墓誌

陳廓字彥明金壇人年十七與鄉貢中熙寧九年進士第主句容簿再調長社令辟江東運司主管帳司改秩知吉水縣又改楚邱縣縣古芒碭也盜發坐繫者百人一夕乘守者怠脫械持兵欲殺令而肆掠人情恟懼彥明不爲動徐部分吏卒格鬪獲其爲首者斬以徇餘黨猶時時倡言以撼居民彥明募致其尤桀黠者并囊橐之家破除之一境大治提刑羅遵以治水自任至縣欲有所爲彥明知無益卽抗言曰此白圭之術也適慚而去除都水監主簿遷北外丞以



職事入奏哲宗察其才論以行召用矣大名帥決河入澶州故道以紓魏患澶人大恐廓爲之增堤峻防水入無患兩川以安出知處州歲饑賑救有方移廣東路轉運判官時同列多以獻羨財進用彥明日財民力也有羨當還以及民可剝民以爲已利乎奏罷徐楊所興錢監民以爲便汰假版吏以保任法選用士類外選爲清就移本路提點刑獄禁雷公淫祀以正風俗罷庾嶺置關以示無外召還篋中無南物丁內艱服除授廣西路提點刑獄未行改利州路予告東歸大觀四年卒年五十五有詩文雜說合三十卷

宋史翼

卷十九

十三

京口耆舊傳

黃彥字修中吳縣人熙寧中以王安石經說與弟頡俱第進士安石舉爲越州教授遷瀛州防禦推官知崇德縣長興丞以省罷知浦江縣清直明恕民盡條祠之紹聖中知虹縣有廟吏譎言井蛇爲龍水能愈疾彥以蛇磔死妖乃不興又麥秀兩岐蝗不入境時稱有古循吏風除楚州教授宗正寺簿改富陽令爲政如前時坐法免管勾嵩山崇福宮官至朝奉大夫

致仕政和四年卒

盧熊蘇州府誌

鄧景平字希尹居帶城橋

盧志初名安平熙寧二年與父伸同登進士第剛

正不撓所涖官有廉介稱嘗爲大理丞每有疑獄中  
夜拜禱斬得其情既請老家居詔復起知饒州數月  
復拂衣歸或問故答曰天子命景平爲郡當以撫字  
爲職乃不得行其志今日須金若干明日須粟若干  
民已枯骨矣捶考不出吾安得不歸時朱勔用事從  
之者甚眾獨景平終始不阿子細字天和亦能文屢

爲郡

吳郡志

段縫熙寧中任職方員外郎知興國軍所屬永興縣  
歲輸免役錢一萬九十餘貫實支纔千餘貫縫不忍  
民力之困而所取寬剩錢過多奏乞裁減先朝下其

章司農守委本路相度而提舉司以一路役法錢數已定爲辭事寢不報繼繼有論列言甚激切神宗特從其請錢得減半未幾召縫赴闕除屯田郎中知潤州又易泰州未到官知諫院蔡確言縫沮壞新法追還新命改差通判閩州縫家貧多病不能遠適乃求分司遂以朝散大夫致仕居間十數年安貧守道江東縉紳之望元祐二年王覲薦之詔落致仕差管勾

宮觀

續資治通鑑  
三百九十五

蔡奕字如晦宋州人父挺宋史有傳奕第進士除無錫主簿遷大理評事熙寧中以太子中允爲湖南轉

運判官提舉常平倉兼農田水利時行青苗助役法  
所置遣多不深維法意奉宣或謬戾奕親行州縣視  
人物地宜度出而賦之入公私稱便遷轉運副使潭  
邵間有上下梅山其地千里馬氏以來獠人據之號  
莫搖有厲禁制其耕墾出入歲久公然冒法奕奏開  
其酋以禍福使爲土民口授其田略爲貸助使業其  
生建邑置吏使知有政上嘉納之會章愔察訪本路  
卽付其事同奕經理徵入其境果大歡從授冠帶畫  
田畝分保伍列鄉里築二邑隸之藉其田以畝計者  
二十四萬增賦數十萬遂招懷邵之武岡蠻三百餘

族戶數萬歲輸米以萬計納其所蓄兵杖以其地建  
二寨上遣使勞之賜邑名曰新化安化寨曰武陽關  
峽遷太常丞直集賢院又撫納邵徽誠等州鎮蠻族  
之歸附者皆以補吏因言治新民法宜有張弛願假  
便宜詔可長沙諸邑負茶租田稅積爲緡錢四萬請  
於赦蠲除乞行保甲法以防盜置錢治衡州以權物  
輕泉重之弊皆從之累官廣西轉運副使桂州經略  
安撫司元豐六年卒年四十四著有文集十卷

劉摯  
撰墓誌

郭子皋字德臣其先京兆人廣明之亂六世祖御史

中丞甫從僖宗入蜀弟及爲廣都令遂家焉以蔭補太廟齋郎改衛尉寺丞知邛州大邑縣縣北與蜀州晉原接壤每歲二邑之民鳩工爲堰決渠溉田晉原據上流有餘則注之他江以邀邑民得重賂乃不爲病謂之買水人素苦之子舉至均以大井斷木爲平以限水廣深多寡自木爲準目曰水平由是大邑之水不買而足號曰郭公平舉監成都交子務紙幣之設本與錢相權至是大壞價錢不售法幾爲廢子舉講求其病錢幣復稱官民利之先是交子務以二年爲任監司奏留子舉半歲遂著令以二年半爲任舉

者三十人知昌州遷太子中舍易階通直郎瀘卒譙  
青因博戲殺人獄五徙輒變監司委子皋一訊而折  
以其獄讞竟獲免死徙知劍州官軍討瀘夷道出劍  
關戍闕卒數十人輒亡從軍以幸戰功及師還主將  
悉捕送郡有司以爲禁卒逋亡踰月當死子皋曰離  
戍從軍非亡命也止罰而釋之郡當兩山間民架竹  
爲茅屋依山而居故多火災子皋教民易以瓦官爲  
陶瓦貸貧民不費而革自是無火患遷奉議郎知利

州元祐二年四月卒年五十有五

太史范  
文公集

吳革字孚道夏津人舉進士爲襄州司戶遷池州貴



池令改著作佐郎熙寧甲寅出爲廣德軍建平令移  
知南雄州課爲廣東第一元豐間擢知吉州終於湖  
南轉運判官革由少年書生治經術爲州縣吏遇事  
力行所聞精於吏職所至必令行禁止在貴池兄弟  
相與訟田爲垂涕說同生當相盡以恩義意兄弟皆  
感涕去方使者行新令給青苗錢革不格詔令而實  
予可貸之民在建平歲饑饉力舉荒政勸發廩所全  
活以萬計南雄州有吏胥鬻獄把持長短聞革嚴能  
乃匿去爲外台吏革下車盡得其姦狀捕取伏法郡  
內肅清吉州自蹇周輔增鹽課二百萬民已失生理

而魏綸上諸縣增課九十五萬革至告諸令後所增  
鹽勿以爲課爲郡獎善士勸不能去甚污德意茂美  
元祐初御史按察南方以革爲愛民吏課稱江西第  
一除江西轉運判官徙湖南元祐三年四月卒年五

十三

山谷文集  
吳君墓誌

李傑字穎伯湖南邵陽人熙寧進士歷知永靖二州  
元祐初年梓州路轉運判官時瀘南安撫使李琮奏  
蠻賊乞弟爲患身死新立願須阿機親手刻到芳牌  
乞投降詔傑與知瀘州張先明接納尋遷梓州路提  
點刑獄五年改金部郎中言利州路興州青陽鎮見

有銅坑一百餘處舊係西河邊防財用司舉官招誘收買又本錢亦是本司計置應副昨廢罷本司將上件銅場併入陝西轉運司管勾自併入後來將銅價僅減一半又本錢多不敷足雖有所舉監官無由辦集采銅之人遂旋散潰所收漸少課利日虧今相度欲乞每斤量與添錢多行計置本錢依舊兼用銀絹于稱下堆塚及比附韶州岑小場例選官量與酬獎使設法措置必有所增詔于利州常平錢內借錢五萬貫充買銅本錢每斤依本處見買價錢餘並從之

長編四百七十二

崇寧元年坐元符末應詔上書議訕謗斥

外史卷之十一  
得罪宗廟勒停編管唐州三年入黨籍邪上尤甚第  
十六人五年于舊資上降兩資收敘後爲湖南安撫  
使終于大理卿嘗買書萬卷藏之郡庠置田數千畝  
以贍宗族

明一統志

潘鯁字昌言福建長樂人曾祖吉甫仕吳越歸宋終  
國子博士祖衢大中祥符元年擢第知同安縣累遷  
檢校屯田郎中歷知興化軍建州軍州事終知黃州  
遂家焉比鯁長復歸閩從周希孟受學登元豐二年  
進士初調蘄州蘄水縣尉民有以花爲獻者鯁一嗅  
而還之曰受賜多矣其廉潔類此遷知州防禦推官

知江州瑞昌郡賦屬縣鬻建茶守問君瑞昌歲可售若干鯁曰四斤耳守詰其說鯁曰縣小民貧米鹽猶不足而暇及茶乎獨縣僚四人一斤可矣守悟以故諸縣皆得無多售後七年以事過瑞有兩民拜馬前其一曰異時君爲縣我認得直其一曰異時君刑我當罪我心服是以偕來徒監楚州都鹽倉尋爲吉州軍事推官元祐赦民負官錢無姦者悉免之通判攝守事悉下負者於獄將鞠其姦鯁曰赦欲寬之而君故獄之耶執不可民賴以免龍泉令捕得私釀三十家將上府鯁謂令曰是法皆當徒龍泉小邑一日徒

三十人君爲令安平令乃頗減出之改宣德郎監漢陽軍酒稅遂以奉議郎致仕仍居於黃卒年六十有

三子大臨字邠老以詩名於時

福建通志

吳思字子正福建邵武人元豐二年進士調蘄州黃梅縣尉再調虔州右司理參軍虔俗獷悍喜訟鬪視他郡爲難治思敏達強濟事至輒迎刃解會昌民有誣告毒斃者縣獄具思直其寃得不死令狼懷訟思不已守遣思更訊卒如思所斷法當遷秩任事者不以聞思曰吾爲理官治獄求生斲盡吾職而已無他觀也就移和州防禦推官除知吉州吉水縣有老吏

舞法爲竄思廉得實繫治之欲汙思以緩其獄闕思  
出謬爲家問置金其中使小吏納之思妻黃氏得書  
覺重疑之卻不受思適自外至發書得金詰得其情  
吏遂伏辜當路以爲能交薦之改宜議郎知池州建  
德縣興學校勸農桑教民力本歲餘大治徽宗登極  
覃恩遷奉議郎賜緋衣銀魚辟福建路轉運司管勾  
文字明年丁母憂服除監江州廣臨監值更錢法日  
夜鳩工赴期會以課最聞再遷承議郎還闕除監大  
觀庫大觀元年以疾卒年五十有三思爲人樂易不  
事表襮家素貧清約自克而闕恤族黨無吝色明達

吏治所至有聲士論每以用不極其材爲憾而思處

荒直恬然也

楊龜山集吳君墓誌銘

吳與字可權福建漳浦人元豐五年進士歷端州四會縣令改饒州餘干徙學於琵琶洲後登科者接踵劉正夫稱其護士如元氣決訟如神明人以爲不虛嘗謁提刑使者燕若蒙論事侃侃不阿若蒙厲聲曰而欲效漢唐令耶與曰固學之恨不至耳若蒙爲之改容移知懷安縣累遷奉議郎通判潮州時故人張商英當國或諷之使見與毅然曰吾遇天覺於放逐中諄諄勉以忠義今可呈身求進耶竟不往官終廣



南東路提點刑獄

案江西通志名宦引餘干志云吳與大觀初爲御史各志皆失載附

錄備

生平歷官凡七任悉以俸餘市書所藏至二萬

餘卷鄭樵稱海內藏書者四家以與所藏本爲最善

王邁作清漳進士題名記於漳先達器識名節首稱

與及高登謂自國初至今科目得士二百五十餘人

獨二公所立光明俊偉一言一動可爲千載矜式

建福

通志

楊存字正叟一字存之江西廬陵人幼日誦數千言

未十歲能屬文既冠第元豐八年進士授彬縣尉丁

父憂服除授袁州司理參軍又丁母憂服除授廣州

南海縣尉改循州長樂縣令長樂二廣窮處也士不知學存首延士子修學校與諸生行鄉飲酒禮民風一變聲最諸邑改宣德郎知河中府猗氏縣改杭州仁和縣錢塘吳越勝地存治整以暇與文士登臨賦詩爲一時絕唱號詩將軍時蔡京窮奸極妖竊弄國柄京久居杭育尼出其門倚京勢奪民地民訴於縣存直之尼訴於京京諷守諭存以地畀尼當酬以美官存執不可秩滿授知襄慶府奉符縣奉符俗獄祠延在焉仕者相傳以爲膏腴之邑令與祠官同掌其利故前令多墨存爲置策書凡四方之民捐金錢以

奉香火者皆書之屬之祠官隸之府廷已無與焉有  
戚里任氏子爲祠官轉移祭器存白諸部刺史以聞  
有詔漕使韓鞫之任置對窮反誣存既具獄存無秋  
毫而任抵罪韓歎曰存之清雖畏人知神知之矣通  
判建昌軍地接闕境盜所出入有惡少屬徒數百殺  
人火廩巡尉憚之論招不從設方略盡擒之旣而戚  
曰愚民觸法情實可矜白州戮渠魁貸其餘民感悔  
盜遂息通判洪州見時事日異靖康元年八月上章  
致仕終建炎戊申年七十有一

楊誠齋集  
楊君墓誌

郭大昕字方進臨邛火井人少機警能文名聲傾西

州登進士科調遂州法曹參軍以憂去服除授戎州  
司戶參軍果州團練判官遷宣德郎知都縣泛恩遷  
奉議郎賜五品服以能舉再任元祐初政以議法忤  
使者移蜀州永康縣遷承議郎通判達州中外交章  
薦其材願得學官以便養乃除梓州教授未至官而  
親歿服除除泰州教授以朝奉郎充陝西路買馬司  
向當公事遷朝散郎知蜀州遷朝請郎卒於官有集  
三十卷大昕好學未嘗一日去書不親敏於文操筆  
立成果州比歲水害民田畜廬舍大昕徵嘉陵江而  
司之在官四年江水平人傳其書似韓潮州移鱉魚

文云卒年五十有六

山谷別集郭方進墓誌

蔣圓字粹仲毘陵人元祐六年進士第調海州司里  
參軍遷潤州丹徒令有能名夏不雨行路多暍死鑿  
井道旁九十有三人賴其惠或號蔣公泉曾布買山  
於邑人鄰者惡之曾爲上鄰法當得圓直言之時蔡  
京用事怨曾氏謂奪民田爲曾氏葬地屬漕臣劉何  
劾治甚急圓恬不爲意斂版進曰與曾公無一日雅  
法當爾耳何悔悟遂反薦圓時人兩賢之樞密院張  
康國挽爲編修官修經武要略等書成賜對上問天  
下所以安危圓曰唐李珣嘗謂文宗曰安危如人之

身當四體平和必順寒暑之節恃安自忽則疾患旋  
生朝廷無事宜省闕失從而補之則禍難不作今承  
平久願陛下以臣之言爲鑒上嗟美之擢知鄂州附  
辭上諭以荆湖多盜卿何以治之對曰唐崔郾嘗治  
鄂謂土沃民剽雜以夷俗非威莫能服臣雖能薄敢  
不竭犬馬力稱器使徙知濠州淮西大旱濠爲甚圓  
欲蠲賦其餘懼漕臣之督過也噤不敢應圓獨銜以  
聞且乞蠲十之九敕書獎諭未幾徙知沂州宋江嘯  
集志命剽掠山東一路州縣大震吏多避匿圓獨修  
戰守之備以兵扼其衝賊不得逞祈哀假道圓嘿然

陽應偵食盡督兵鏖戰大破之餘眾北走龜蒙間卒  
投戈請降或請上其狀圓曰此郡將職也何功之有  
除開封少尹輒賜對上問宋江事圓敷奏始末益多  
其才時年已七十矣元夕從登樓上命中貴人以寶  
杯宣勸一府以爲榮除大卿翼日拜光祿卿以疾乞  
補郡遂除祕閣修撰知通州復以疾辭提舉江州太  
平觀聞二聖蒙塵疾寢革遂致仕建炎四年卒年八  
十有八

毘陵集蔚  
公墓誌

宋史翼卷十九終

男樹

漢書

校字